

阿彌陀鼓音聲王陀羅尼經

失譯人名開元附梁錄

如是我聞一時佛在瞻波大城伽伽靈池與大比丘衆五百人俱爾時世尊告諸比丘今當爲汝演說西方安樂世界今現有佛號阿彌陀若有四衆能正受持彼佛名號以此功德臨欲終時阿彌陀佛即與大衆往此人所令其得見見已尋生慶悅倍增功德以是因緣所生之處永離胞胎穢欲之形純處鮮妙寶蓮華中自然化生具大神通光明赫奕

爾時十方恒沙諸佛皆共讚彼安樂世界所有佛法不可思議神通現化種種方便不可思議若能有信如是之事當知是人不可思議所得業報亦不可思議阿彌陀佛與聲聞俱如來應正徧知其國號曰清泰聖王所住

其城縱廣十千由旬於中充滿剎利之種阿彌陀佛如來應正徧知父名月上轉輪聖王其母名曰殊勝妙顏子名月明奉事弟子名無垢稱智慧弟子名曰攬光神足精勤名曰大化爾時魔王名曰無勝有提婆達多名曰寂靜阿彌陀佛與大比丘六萬人俱若有受持彼佛名號堅固其心憶念不忘十日十夜除捨散亂精勤修習念佛三昧知彼如來常住於安樂世界憶念相續勿令斷絕受持讀誦此鼓音聲王大陀羅尼十日十夜六時專念五體投地禮敬彼佛堅固正念悉除散亂若能令心念念不絕十日之中必得見彼阿彌陀佛并見十方世界如來及所住處唯除重障鈍根之人於今少時所不能覩一切諸善皆悉迴向願得往生安樂世界垂終之

日阿彌陀佛與諸大衆現其人前安慰稱善
是人即時甚生慶悅以是因緣如其所願即
得往生佛告諸比丘何等名爲鼓音聲王大
陀羅尼吾今當說汝等善聽唯然受教於時
世尊即說呪曰

多你他 一 婆離 二 阿婆離 三 娑摩婆羅 四 尼
地奢 五 昵闍多禰 六 昵茂邱 七 昵茂企 八 闍
羅婆羅車駄禰 九 宿佉波啼昵地奢 十 阿彌
多由婆離 十一 阿彌多蛇 十二 婆羅婆陀禰 十三 涅
浮提 十四 阿迦舍昵浮陀 十五 阿迦舍昵提奢 十六
阿迦舍昵闍啼 十七 阿迦舍離 十八 阿迦舍達奢
尼 十九 阿迦舍提他禰 二十 留波昵提奢 二十一 遮
埤唎達摩波羅娑陀禰 二十二 遮埤唎阿利蛇
娑帝蛇波羅娑陀禰 二十三 遮埤唎末伽婆那
波羅娑陀禰 二十四 婆羅毗梨耶波羅娑陀禰

二十五 達摩呻他禰 二十六 久舍離 二十七 久舍羅
昵提奢 二十八 久舍羅波羅啼他禰 二十九 佛陀
久舍離 三十 毗佛陀波羅波斯 三十一 達摩迦羅
禰 三十二 昵專啼 三十三 昵浮提 三十四 毗摩離 三十五
毗羅闍 三十六 羅闍 三十七 羅斯 三十八 羅婆正
三十九 羅娑伽羅婆羅 四十 羅娑伽羅阿地他禰
四十一 久舍離 四十二 波羅啼久舍離 四十三 毗久
舍離 四十四 他啼 四十五 修陀多至啼 四十六 修波
羅奢多至啼 四十七 修波羅啼癡啼 四十八 修離
四十九 修目企 五十 達咩 五十一 達達咩 五十二 離婆
五十三 遮婆離 五十四 阿菟舍婆離 五十五 佛陀迦
舍昵求禰 五十六 佛陀迦舍求禰 五十七 娑婆呵
五十八
此是阿彌陀鼓音聲王大陀羅尼若有比丘
比丘尼清信士女常應至誠受持讀誦如說

修行行此持法當處閑寂洗浴其身著新淨衣飲食白素不噉酒肉及以五辛常修梵行以好香華供養阿彌陀如來及佛道場大菩薩衆常應如是專心繫念發願求生安樂世界精勤不怠如其所願必得往生於彼佛世界時阿彌陀佛與諸大衆坐寶蓮華其土叢林華果鮮敷間錯嚴飾復有樹王香風馥扇出和雅音純說無上不思議法復有妙香名曰光明若干塗香亦是寶香阿彌陀佛於大寶華結加趺坐有二菩薩一名觀世音二名大勢至是二菩薩侍立左右無數菩薩周匝圍繞於此衆中若能深信無狐疑者必得往生阿彌陀國其地真金七寶蓮華自然涌出若有四衆受持讀誦彼佛名號乃至無有水火毒藥刀杖之怖亦復無有夜叉等怖除有

過去重罪業障極至十日必果所願佛說是阿彌陀鼓音聲王陀羅尼時無量衆生皆悉發願志求生彼極樂世界於時世尊讚言善哉善哉如汝所願必得生彼聞佛說已天龍八部歡喜踊躍作禮奉行

阿彌陀鼓音聲王陀羅尼經